

GLAVA ŠESTA

BOSNA I HERCEGOVINA KAO SAMOSTALNA DRŽAVA 1991–1995.

1. AMANDMAN XL NA USTAV SRBiH iz 1974. god.

Prema amandmanu XL na Ustav SR BiH iz 1974. god. koji je usvojen 1990. godine Bosna i Hercegovina se definira kao *"... suverena demokratska država ravnopravnih građana, naroda Bosne i Hercegovine – Muslimana, Srba i Hrvata i pripadnika drugih naroda i narodnosti koji u njoj žive."*

Izvor naveden prema: K. TRNKA, *Konstitutivnost naroda*, 26.

Komentar – Već tokom 1990. republike iz sastava bivše Jugoslavije su poduzimale određene korake u smislu stvaranja uvjeta za jačanje svoje samostalnosti. Tako je Hrvatski sabor 22. decembra 1990. usvojio sasvim novi ustav, a i u Sloveniji je pripreman amandman kojim bi se ta republika definirala kao sasvim samostalna država. U ovom razdoblju ustavnih promjena i u Bosni i Hercegovini je koncem 1990. usvojen amandman XL na Ustav SRBiH iz 1974. kojim je definiran ustavni status BiH, odnosi u njoj, kao i njeni odnosi prema drugima. U skladu sa tim, BiH je *"... suverena demokratska država ravnopravnih građana naroda BiH – Muslimana, Srba i Hrvata i pripadnika drugih naroda i narodnosti koji u njoj žive ..."* U sklopu ovih ustavnih promjena posebna pažnja je posvećena ravnopravnosti tri konstitutivna naroda, kao i pripadnicima drugih naroda u BiH. Utvrđeno je da se država i društvo razvijaju na principu nacionalne ravnopravnosti i građanske demokracije zasnovane na privatnom vlasništvu, tržišnoj privredi, političkom pluralizmu, te zaštiti građanskih prava i sloboda.